

UBWIZA N'AGACIRO K'UKWEZI KWA MUHARAMU

Ukwezi kwa Muharamu ni ukwezi gufite imigisha n'ibyiza byinshi bihambaye, niko kwezi kwa mbere ku mwaka wa kislamu kandi kukaba mu mezi ane matagatifu,

Imana yavuze igira iti: ((Muby'ukuri umubare w'amezi ku Mana ni cumi n'abiri, niyo Imana yanditse kuva igihe yaremye ibirere n'isi, muri ayo mezi harimo amezi ane azira (matagatifu), iyo ni Idini itunganye muramenye ntimuzayahuguzemo imitima yanyu)) Qor'an 9:36.

Intumwa y'Imana (Imana imuhe amahoro n'imigisha) yaravuze iti: ((Umwaka ufite amezi cumi n'abiri harimo amezi ane matagatifu ariyo atatu akurikirana: Dhul Qaadah, Dhul'Hijjah na Muharamu na Radjab iri hagati y'ukwezi kwa Djumada Thani n'ukwezi kwa Shabani).

Icyitonderwa :

Aho Imana ivuga iti: ((Ntimuzayahuguzemo imitima yanyu mukora ibyaha))

Bisobanuye ko kizira gukora icyaha no muyandi mezi asanzwe atari aya ane matagatifu, ariko igikozwe muri aya mezi ane kiba kiremereye by'akarusho ndetse n'ibihano byacyo ku Mana biba byikubye kenshi kubera gutatira icyubahiro cyayo.

GUSIBA MU KWEZI KWA MUHARAMU

Intumwa y'Imana Imana imuhe amahoro n'imigisha yaravuze iti:

((Igisibo cyiza nyuma ya Ramadhani n'igisibo cyo mu kwezi kwa Muharam)).

GUSIBA UMUNSI WA CUMI MU KWEZI KWA MUHARAMU

Intumwa y'Imana igeze mu mujyi wa Madinah yasanze Abayahudi basiba umunsi wa cumi mu kwezi kwa Muharamu, maze irababaza iti: kubera iki muwusiba? baramusubiza bati: uyu ni umunsi mwiza, niwo munsi Imana yarakoyeho Intumwa yayo Musa n'Abayisirayeli ibakiza umwanzi wabo Firauni n'ingabo ze barohama mu nyanja, Intumwa y'Imana Musa yajyaga iwusiba mu rwego rwo gushimira Imana.

Maze Intumwa y'Imana Muhamadi iravuga iti: ((Ni jyewe ukwiye gukurikiza Intumwa Musa kubarusha, kuva icyo gihe itangira kuwusiba inategeka Abayisilamu kuwusiba)).

IBYIZA BYO GUSIBA UMUNSI WA CUMI W'UKWEZI KWA MUHARAMU

Intumwa y'Imana yajyaga ikurikirana ukwezi cyane kugirango imenye iminsi yo gusiba ariko byabaga akarusho ku munsi wa cumi w'ukwezi kwa Muharamu n'ukwezi kwa Ramadhani. Naho ku byiza n'ibihembo byo gusiba uwo munsi, Intumwa y'Imana yaravuze igira iti: ((Umunsi wa cumi wa MUHARAMU nizeye ku Mana ko uwusibye bimuhanaguraho ibyaha by'umwaka washize wose)).

INZEGO ZO GUSIBA UMUNSI WA CUMI

Gusiba uyu munsi bifite inzego n'uburyo butatu busumbana mu bwiza bukaba buteye butya:

*Gusiba umunsi wa cumi wonyine.

*Gusiba umunsi wa cumi ukawufatanyaga n'uwa cyenda, ubwo ugasiba iminsi ibiri uwa cyenda n'uwa cumi, ibi bikaba ari byiza kuruta gusiba umunsi umwe gusa.

*Gusiba umunsi wa cyenda n'uwa cumi n'uwa cumi n'umwe, ukaba usibye iminsi itatu, ibi bikaba ari byo byiza kurusha ubundi buryo bwose twagaragaje.